

मार्निंग डोगरी न्यूज़ बुलेटिन, समें. **09-20** Hrs

<><><><><><>

Headlines

1. केन्द्री खजाना मंत्री निर्मला सीतारमण होर अज्ज 2025–26 ब'रे लेई केन्द्र बजट पेश करगंन।
2. राष्ट्रपति द्रौपदी मुर्मू होर अज्ज नमीं दिल्ली दे भारत मंडपम च विश्व पुस्तक मेला–2025 दा उद्घाटन करगंन।
3. उपराज्यपाल मनोज सिन्हा होरें निजी क्षेत्र गी खतरनाक बमारिएं थमां कसरिएं लेई पैलिएटिव केन्द्र बनाने च प्रशासन दा सैहयोग करने लेई अग्गे औने लेई आखेआ।
4. सेहत ते मैडिकल शिक्षामंत्री सकीना इत्तू होरें सेहत ते शिक्षा बख्खी चेचा ध्यान देने दे सरकार दे धेइयै गी फही पक्का कीता ऐ।
5. श्री माता वैष्णो देवी श्राइन बोर्ड नै श्रद्धालुएं लेई हवन पूजा दी सुविधा शुरू कीती ऐ, बजुर्गे ते दिव्यांगें लेई हैलीकाप्टर सेवा च कोटा रखेआ गेआ ऐ।

<><><><><><>

Budget

केन्द्री खजाना मंत्री निर्मला सीतारमण होर अज्ज लोकसभा च 2025–26 ब'रे दा केन्द्री बजट पेश करगंन। मोदी सरकार दे त्रीए कार्जकाल दा एह पैह्ला पूरा बजट होग। निर्मला सीतारमण होर उपरोतली अपना 8मां बजट पेश करियै नमां इतिहास रचगंन, जेहदे च उंदे आस्सेआ अजें तोड़ी पेश कीते गेदे दऊं अंतरिम बजट बी शामिल न। बजट कोला समाज दे हर वर्ग गी मतिया मेदां न जिसलै जे माहिरें दा आखना ऐ की जे सरकार नै 2047 भारत गी इक विकसित राष्ट्र बनाने दा लक्ष्य मित्थे दा ऐ तां बजट दा पूरा जोर इस ब'रे बी पिछले ब'रे आला लेखा ढांचागत विकास कम्में, समाज कल्याण, ग्रीमण विकास ते हाल च गै अर्थबवस्था च आई दी नरमी गी रफतार च बदलने दे उपाए पर होई सकदा ऐ। खजाना मंत्री बडलै 11 बजे सदन च बजट पेश करगंन। बजट कोला इक रोज पैहले कल आर्थिक सर्वेक्षण संसद दे दौनें सदनें च रखेआ गेआ जेहदे च अर्थबवस्था दी कारकरदगी दा लेखा जोखा पेश कीता गेदा होंदा ऐ।

<><><><><><>

World Book Fair

विश्व पुस्क मेला 2025 नमीं दिल्ली दे भारत मंडपम च अज्ज पैहली फरवरी गी शुरू होआ'रदा ऐ। इस बरे मेले दा विषय सार ऐ "हम भारत के लोग"। 9एं दिनें तोड़ी चलने आहले इस मेले दा उद्घाटन राष्ट्रपति द्रौपदी मुर्मू होर करंगन। आकाशवाणी समाचार कन्ने गल्ल करदे होई नैशनल बुक ट्रस्ट दे निदेशक युवराज मलिक होरें दससेआ जे इस बरे लेई मुख् देश रूस ऐ ते एहदे च फ्रांस, अर्जेटीना, स्पेन, कोलंबिया, संयुक्त अरब अमीरात ते कतर सने 50 कोला मते मुख् हिस्सा लै करदे न। उनें दस्सेआ जे मेले च कोई 2 जहार प्रकाशक ते इक्क जहार वक्ता हिस्सा लैंगन।

<><><><><><>श

LG

उपराज्यपाल मनोज सिनहा होरें निजी क्षेत्र गी आखेआ ऐ जे ग्रामीण ते दूर दरेड़े इलाकें च पैलिएटिव सेंटर खोलने लेई प्रशासन कन्ने रलियै कम्म करने लेई अगो औन। पैलिएटिव सेंटर जिनेंगी प्रशामक केन्द्र बी आखेआ जंदा ऐ, ऐसे केई होंदे न जित्थें गंभीर बमारिएं दे कसरिएं गी रखेआ जंदा ऐ ते उनेंगी इलाज दे इलावा सेहत, शांति ते सकून देने आला माहोल उपलब्ध कराया जंदा ऐ तां जे ओ बेहतर मसूस करी सकन। उपराज्यपाल होरें कल एम्स जम्मू च आयोजित इंडियन एसोसिएशन ऑफ पैलिएटिव केअर दे 32में अंतराष्ट्रीय सम्मेलन दे उद्घाटनी सत्र गी संबोधत करदे होई एह गल्ल आक्खी। उपराज्यपाल होरें सरबंघत माहिरें गी आखेआ जे जानलेवा बमारिएं दे मरीजें प्रगति मता संवेदनशील रौह अपनान ते उंदे परोआरें दी भलाई बेहतरी, उंदे दर्द गी घट्ट करने ते उनेंगी मानसिक ते अध्यात्मिक शांति लेई बनकदा माहोल ते बवस्था उपलब्ध कराने बक्खी विशेष ध्यान दित्ता जा। कल शुरू होई दी इस त्रै रोजा कांफ्रेंस च 200 कोला मते माहिर हिस्सा लै करदे न जेह्दे नेह मामलें च अपने माहिराना सुझाह ते बचार रखगन।

<><><><><><>

Dy.CM

उपमुख्यमंत्री सुरिन्द्र चौधरी होरें कल नौशेहरा दे सरकारी डिग्री कालेज च स्पोर्ट्स ब्लाक लेई नीह पत्थर रखेआ। तकरीबन 5 करोड़ 8 लक्ख 50 जहार रपे दी लागत आली इस परियोजना दा मकसद खेड्डें दे बुनियादी ढांचे गी बधाना ते विद्यार्थिएं ते खडारिएं लेई बेहतर सुविधा उपलब्ध करोआना ऐ। इस मौके पर बोलदे होई उपमुख्यमंत्री होरें युवाएं च खेड्डें ते तंदरुस्ती गी बढ़ावा देने लेई सरकार दी प्रतिबद्धता गी फही पक्का कीता। उनें इस गल्लै पर लोह पाई जे नमां सपोर्ट्स ब्लाक आधुनिक सिखलाई आली सहूलतें कन्ने लैस होग जेह्दा विद्यार्थिएं गी खेड्डें च बधी-चढ़ियै हिस्सा लैने लेई प्रोत्साहित करोग। उपमुख्यमंत्री होरें इस परियोजना गी समें सिर पूरा करने लेई मुत्तलका अर्जेसिएं गी निर्देश दित्ते।

<><><><><><>

CS

मुख्य सचिव अटल डुल्लू होरें सिविल सचिवालय च खाद्य नागरिक आपूर्ति ते उपभोक्ता मामले दे मैहकमे ते मैहकमा नाप-तोल दे कम्मं काजें दी समीक्षा लेई इक उच्ची सतह दी बैठक दी अध्यक्षता कीती। बैठक च मैहकमे दे कमीशनर सैक्रेटरी सनें होरने वरिष्ठ अधिकारी बी शामिल हे। दौनें मैहकमे दे जतनें दी सराहना करदे होई मुख्य सचिव होरें गैर कनूनी तौर पर चला'रदी हटिटएं दे कम्मकाज गी रोकने लेई सख्त निगरानी दी लोड़ पर जोर दित्ता। उनें उपभोक्ता लेई समेयान बंडने आले सब्बने कारोबारी हटिटएं दी नियमित तौर पर निगरानी करने लेई सरबंधत धड़ें पर जोर पाया।

<><><><><><>

PMMVY

जिला रामबन च महिला ते बाल विकास मैहकमा गर्भवती महिलाएं ते बच्चे गी दुध पलेयाने आली महिलाएं गी प्रधानमंत्री मातृ वंदना योजना तैहत् 5 जहार रपे दा माली प्रोत्साहन दित्ता जंदा ऐ जेहड़ा उनेंगी दऊं किशतें च उपलब्ध होंदा ऐ। पैहली किशत बच्चे दे जन्म कोला पैहले चैक-अप दे बाद 3 जहार रपे ते दूई किशत बच्चे दे जन्म ते टीकाकरण दे 14 हफ्ते बाद 2 जहार रपे दित्ती जंदी ऐ। इस योजना लेई गर्भवती महिला जां बच्चे गी दुध पलेयानी आली मां जेड़ियां इस योजना लेई योग्य लाभार्थी न, एह्दे लेई नेड़मे आंगनवाड़ी जां आशा वर्करे कन्नै ऑनलाइन फार्म भरियै आवेदन करी सकदियां न।

<><><><><><>

Sakina Itoo

सेहत ते मैडिकल शिक्षा मंत्री सकीना इत्तू होरें बाबा जित्तो ऑडीटोरियम स्कास्ट च एसजीएसडी इंटरनेशनल स्कूल दे सलाना समारोह च मुखख परौहने दे तौर पर शिरकत कीती। अपने संबोधन च सकीना इत्तू होरें मुखमंत्रि उमर अब्दुल्ला हुंदी सरकार दा सेहत ते शिक्षा पर चेचा ध्यान देने दे धेड़्यै गी फही पक्का कीता। इस मौके पर उनें युवा पीढ़ी च नशे दी कबैतु दी रोकथाम लेई स्कूलें दी अहम भूमका पर लोह पाई। उनें माता पिता ते अध्यापकें गी आग्रह कीता जे ओह् इस खतरे गी सामूहिक तौर पर रोकने लेई सरकारी अजेंसिएं गी सैहयोग देन। इस कार्यक्रम च कृषि सरबंधी मंत्री जावेद अहमद डार होरें बी हिस्सा लैता।

<><><><><><>

SMVDSB

जम्मू कश्मीर च श्रद्धालुएं दे आध्यात्मिक अनुभव गी बेहतर करने आस्तै इक महत्वपूर्ण शुरुआत करदे होई श्री माता वैष्णो देवी श्राइन बोर्ड नै श्रद्धालुएं आस्तै हवन पूजा सुविधा शुरु कीती ऐ। आकाशवाणी जम्मू संवाददाता

नै दस्सेआ जे वरिष्ठ नागरिकें ते शारीरिक चुनौतिएं दा सामना करा'रदे दिव्यागें आस्तै हैलीकाप्टर सेवाएं च विशेष कोटे दा ऐलान कीता ऐ। हवन पूजा सुविधा रोज बडलै 9 बजे थमां दपैहरी 3 बजे तोड़ी 4 स्टालें च उपलब्ध होग। बद्धोबद्ध इक दिन च 45 श्रद्धालु एहदे च शामिल होई सकदे न।

<><><><><><>

Annoncement

केन्द्री बजट 2025–26 बारे आकाशवाणी दा क्षेत्रीय समाचार एकांश जम्मू कल ऐतवारें इक विशेष परिचर्चा प्रसारत करोग। 45एं मिंटे दा एह परिचर्चा कल रातीं 8 बजे साढ़े प्राइमरी चैनल पर प्रसारित कीती जाग जेहड़ा तुस मीडियम वेव 303 मीटर यानि 990 किलोहर्टस एफएम 100.3 मैगाहर्टस ते ओआरएम 981 किलोहर्टस पर सुनदे हो। इस परिचर्चा च समाज दे बक्ख–बक्ख वर्गे कन्नै तालुक रखने आले माहिर बजट दे बक्ख–बक्ख पैहलुएं पर चर्चा करगन। श्रोताओ जेकर तुंदे मने च बजट गी लेइयै कोई सोआल जा शँका ऐ ते तुस चाहदे ओ जे ओ सोआल अस माहिरें कोला पुच्छे, तां अपना सोआल तुस साढ़े ई–मेल rnujammu@gmail.com पर लिखियै भेजी सकदे ओ।

<><><><><><>

Doda Festival

डोडा जिला प्रशासन आस्सेआ 8 फरवरी गी लाल द्रमन विंअर फैस्टीवल दा आयोजन कीता जा'रदा ऐ। आकाशवाणी जम्मू संवाददाता दी रिपोर्ट मूजब इस उत्सव दा आयोजन जिला प्रशासन आस्सेआ Tejas Ek Pahal Foundation, सैलसफा मैहकमे ते भारतीय सेना दे सैहयोग कन्नै कीता जा'रदा ऐ। इस उत्सव च केई सारी गतिविधिएं दी योजना बनाई गई ऐ जिंदे च गाने आली प्रतियोगिता, सांस्कृतिक कार्यक्रम, मैहकमे आस्सेआ स्टाल ते खेड्डें दे आयोजन सनें होरनी गतिविधियां बी शामिल न। इस उत्सव दे सुचारु संचालन लेई डोडा दे डिप्टी कमीशनर होरें इक बैठक दी अध्यक्षता कीती जेहूदे च इस उत्सव दी तैआरिएं दा जायजा लैता गेआ।

<><><><><><>

DM Jammu

जम्मू दे जिला विकास कमीशनर सचिन कुमार वैश्य होरें जिले च सब्बने सरकारी ते प्राइवेट सेहत इदारें च कचरा प्रबंधन दी बवस्थाएं दे बारे च तफसीली रिपोर्ट मंगी भेजी ऐ तां जे इस गल्लै गी जकीनी बनाया जाई सकै ते ओ बायो मैडिकल वेस्ट दे नियमें मूजब कचरे गी खपाने दे बवस्था करा करदे न जां नेई।

<><><><><><>